

Na osnovu člana 64. i 65. Zakona o osnovnom odgoju i obrazovanju ("Službene novine Kantona Sarajevo br,10/04) i člana 87. Pravila JU Osnovna škole "Mirsad Prnjavorac" Vogošća, Školski odbor je na sjednici održanoj dana 26.01.2010. godine donio

P R A V I L N I K O ODGOJNO-DOSCIPLINSKIM MJERAMA ZA UČENIKE

I OPŠTE ODREDBE

Član 1.

Ovim Pravilnikom uređuje se priroda i opseg disciplinskih mjera koje se preduzimaju u školi, postupak za utvrđivanje disciplinske odgovornosti učenika/učenice, procedura za primjenu takvih mjera, dužina izrečenih odgojno-disciplinskih mjera i njihovo ublažavanje, ukidanje, posljedični odnos na ocjenu iz vladanja učenika/učenice i naknadi pričinjene materijalne štete, procedura kojom je roditelji ili staratelji učenika /učenice mogu osporiti i druga pitanja vezana za primjenu odgojno-disciplinskih mjera prema učenicima/učenicama.

II ODGOJNO-DISCIPLINSKE MJERE

Član 2.

U skladu sa Zakonom o osnovnom odgoju i obrazovanju i Pravilima škole, škola izriče odgojno-disciplinske mjere učeniku/učenici koji/koja:

- neopravdano izostaje sa nastave,
- neprimjereno se odnose prema učenju, drugim učenicima/učenicama, nastavnicima/nastavnicama i drugim zaposlenicima škole,
- nanosi štetu na imovini škole.

Član 3.

Odgojno-disciplinske mjere su:

- ukor razrednika/razrednice,
- ukor odjeljenskog vijeća,
- ukor direktora/direktorice,
- ukor Nastavničkog vijeća
- premještaj u drugo odjeljenje iste škole,
- premještaj u drugu najbližu osnovnu školu na području općine, odnosno Kantona.

Mjera premještaja u drugu najbližu školu na području općine, odnosno Kantona se može izreći samo za učenike/učenice od petog do devetog razreda i to samo jednom u toku školske godine, o čemu je škola dužna obavjestiti i Centar za socijalni rad Kantona Sarajevo.

Izricanje odgojno-disciplinskih mjera učenicima sa posebnim potrebama vrši se uz prethodne konsultacije sa nadležnim službama, odnosno stručnim licima.

Član 4.

Odgojno disciplinske mjere se, po pravilu, donose postupno i povlače snižavanje ocjene iz vladanja.

Član 5.

Ukor razrednika/razrednice može se izreći za lakše povrede školske discipline. Pod lakšim povredama školske discipline u smislu prethodnog stava smatraju se:

- 10 neopravdanih izostanaka sa pojedinih časova,
- samovoljno napuštanje časova u 10 navrata,
- 10 neopravdanih zakašnjenja u školu,
- nekolegijalan ili uvredljiv odnos prema drugovima,
- nezalaganje u učenju i neostvarivanje pozitivnih rezultata iz neopravdanih razloga iz najmanje dva predmeta.

Član 6.

Ukor odjeljskog vijeća može se izreći za sljedeće teže povrede školske discipline:

- neopravdani nedolazak u školu 3 dana,
- neopravdani izostanci sa časova više od 15 puta,
- samovoljno napuštanje časova više od 15 puta,
- dolazak u školu sa zakašnjenjem više od 15 puta,
- uvredljiv odnos prema nastavnicima,
- učestalo ometanje rada na časovima i pored usmene opomene,
- nesurađivanje i pasivan odnos u radu sa nastavnicima/nastavnicama,
- nezalaganje u učenju i ne ostvarivanje pozitivnih rezultata iz neopravdanih razloga iz najmanje tri predmeta,
- nečuvanje školskog inventara.

Član 7.

Ukor direktora/direktorice može se izreći za sljedeće teže povrede školske discipline:

- neopravdan nedolazak u školu 5 dana,
- učestali neopravdani izostanci sa pojedinih časova više od 20 puta,
- učestalo samovoljno napuštanje časova više od 20 puta,
- učestali uvredljiv odnos prema nastavnicima/nastavnicama ili zaposlenicima škole,
- donošenje u školu i konzumiranje duhana, alkohola ili drugih narkotičnih sredstava,
- prisvajanje pojedinih predmeta – školske imovine male vrijednosti,
- nečuvanje i neprimjeren odnos prema školskoj imovini,
- izazivanje i učestvovanje u tuči u školi i na drugom mjestu.
- namjerno nasilničko fizičko ili psihičko ponašanje prema učenicima škole,
- donošenje u školu i školsko dvorište noževa, čakija i drugih oštrih predmeta, kao i petardi i drugih pirotehničkih sredstava.

Član 8.

Ukor Nastavničkog vijeća može se izreći za sljedeće teže povrede školske discipline:

- a neopravdan nedolazak u školu više od 6 dana,
- b učestali neopravdani izostanci sa časova više od 25 puta,
- c učestalo samovoljno napuštanje časova više od 25 puta,
- d učestali nedolasci u školu sa zakašnjenjem više od 25 puta,
- e učestali uvredljiv odnos prema nastavnicima/nastavnicima ili zaposlenicima škole,
- f nečuvanje školske imovine i prouzrokovanje štete na pojedinim dijelovima imovine male vrijednosti,
- g prisvajanje školskih predmeta,
- h stalno ometanje rada u toku nastave i pored ukora odjeljenskog vijeća,
- z nezalaganje u učenju i neostvarivanje pozitivnih rezultata iz neopravdanih razloga iz 3 ili više predmeta,
- ž uvredljiv ili nepristojan odnos prema direktoru/direktorici škole.
- z namjerno nasilničko fizičko ili psihičko ponašanje prema učenicima škole,
- o donošenje u školu i konzumiranje duhana, alkohola ili drugih narkotičkih sredstava,
- m donošenje u školu i školsko dvorište noževa, čakija i drugih oštrih predmeta, kao i petardi i drugih pirotehničkih sredstava.

Član 9.

Premještaj u drugo odjeljenje iste škole može se izreći učeniku za sljedeće povrede školske discipline :

- nečuvanje školske imovine i prouzrokovanje štete veće vrijednosti,
- prisvajanje školskih predmeta veće vrijednosti,
- stalno ometanje rada u toku nastave i pored izrečene mjere ukora Nastavničkog vijeća,
- uvredljiv odnos prema nastavnicima/nastavnicama i drugim zaposlenicima škole i pored ukora Nastavničkog vijeća,
- nezalaganje u učenju i neostvarivanje pozitivnih rezultata iz neopravdanih razloga iz više predmeta u dužem vremenskom periodu,
- namjerno nasilničko fizičko ili psihičko ponašanje prema učenicima škole,
- donošenje u školu i konzumiranje duhana, alkohola ili drugih narkotičkih sredstava,
- donošenje u školu i školsko dvorište noževa, čakija i drugih oštrih predmeta, kao i petardi i drugih pirotehničkih sredstava.

Član 10.

Mjera premještaj u drugu najbližu osnovnu školu na području općine, odnosno Kantona, može se izreći učeniku, ukoliko i pored izrečene odgojno-disciplinske mjere premještaj u drugo odjeljenje, nastavi da kontinuirano vrši povrede školske discipline iz prethodnog člana.

Najbliža osnovna škola iz prethodnog stava, obavezna je primiti učenika/učenicu kome/kojoj je, nakon konačnog rješenja, izrečena odgojno-disciplinska mjera premještaj u drugu najbližu osnovnu školu na području općine, odnosno Kantona.

Škola je nakon izricanja odgojno-disciplinske mjere iz stava 1. ovog člana dužna o tome obavijestiti i Centar za socijalni rad Kantona Sarajevo.

III POSTUPAK ZA UTVRĐIVANJE DISCIPLINSKE ODGOVORNOSTI

Član 11.

Za utvrđivanje disciplinske odgovornosti potrebno je provesti određeni postupak. Postupak za utvrđivanje disciplinske odgovornosti bi se sastojao u sljedećem:

1. Po saznanju za učinjeni disciplinski prekršaj razrednik/razrednica uzima pismenu izjavu od učenika,
2. Pored izjave koju da učenik – počinitelj disciplinskog prekršaja, potrebno je uzeti i izjave prisutnih učenika- očevidaca, kao pokušati pribaviti i druge dokaze,
3. Pribavljene izjave čine sastavni dio prikupljene dokumentacije u postupku izricanja određene odgojno-disciplinske mjere.

Član 12.

Prilikom uzimanja izjave mora se voditi računa da izjava obavezno sadrži: ime i prezime učenika koji je učinio disciplinski prekršaj, naznaku odjeljenja, kratak opis učinjenog djela, datum kad se prekršaj dogodio, pod kojim okolnostima i druge činjenice koje su od važnosti za utvrđivanje disciplinske odgovornosti.

Izjava može biti unaprijed pripremljena kao obrazac od strane pedagoga-psihologa škole.

Član 13.

Razrednik/razrednica prije predlaganja, odnosno izricanja odgojno-disciplinske mjere dužan je obaviti razgovor sa pedagogom-psihologom škole, kao na razgovor uputiti i učenika-počinioca prekršaja.

O ovom obavljenom razgovoru mora se voditi zapisnik koji će biti sastavni dio prikupljene dokumentacije.

Član 14.

Razrednik/razrednica obavezno mora da pozove roditelja ili staratelja učenika-počinioca disciplinskog prekršaja, s kojim će obaviti razgovor o nastalom problemu.

Član 15.

Nakon provedenog postupka utvrđivanja odgovornosti učenika, razrednik/razrednica pristupa predlaganju izricanja određene odgojno-disciplinske mjere učeniku koji je počinio disciplinski prekršaj.

IV POSTUPAK ZA IZRICANJE ODGOJNO – DISCIPLINSKIH MJERA

Član 16.

Odgojno-disciplinska mjera – ukor razrednika/razrednice- izriče se na osnovu evidentiranih prekršaja učenika/učenice u odjeljenskoj knjizi ili disciplinskoj svesci. Ovu disciplinsku mjeru izriče razrednik/razrednica i ona se evidentira u odjeljenskoj knjizi u imeniku učenika u rubrici "napomena".

Član 17.

Odgojno-disciplinska mjera - ukor odjeljenskog vijeća - se izriče na osnovu evidentiranih prekršaja učenika/učenice u odjeljenskoj knjizi ili disciplinskoj svesci, a na prijedlog razrednika/razrednice ili predmetnog nastavnika/nastavnice.

Na sjednici odjeljenskog vijeća vodi se rasprava o prijedlogu za izricanje odgojno-disciplinske mjere i evidentira se u zapisnik odjeljenskog vijeća, a odluka se donosi ličnim izjašnjavanjem članova odjeljenskog vijeća i odluka je donesena ako se za nju izjasni većina članova tog vijeća.

Ukor odjeljenskog vijeća se evidentira u odjeljenskoj knjizi, a o izrečenoj mjeri se obavještavaju roditelji ili staratelji učenika/učenice.

Član 18.

Odgojno-disciplinska mjera - ukor direktora - izriče direktor/direktorica škole, a na prijedlog razrednika/razrednice.

Prilikom izricanja ove odgojno-disciplinske mjere moraju se uzeti u obzir svi podaci o učeniku kojima raspolaže pedagog-psiholog škole, a koji su u vezi sa učeničkim ponašanjem i efektima prethodno izrečenih mjera.

Ova odgojno-disciplinska mjera evidentira se u odjeljenskoj knjizi i obavezno upisuje u đačku knjižicu, o čemu se obavještava roditelj ili staratelj.

Član 19.

Odgojno-disciplinske mjere ukor Nastavničkog vijeća, premještaj u drugo odjeljenje iste škole i premještaj u drugu najbližu osnovnu školu na području općine, odnosno Kantona, izriče Nastavničko vijeće na prijedlog razrednika/razrednice, pedagoga-psihologa škole ili direktora škole, o čemu se donosi rješenje.

Odgojno-disciplinske mjere iz stava 1. ovog člana donosi Nastavničko vijeće škole većinom glasova prisutnih članova Nastavničkog vijeća, koje se evidentiraju u zapisnik Nastavničkog vijeća.

Ove odgojno-disciplinske mjere se evidentiraju u odjeljenskoj knjizi i đačkoj knjižici, a o njima se obavještavaju roditelj ili staratelj.

Član 20.

Postupak o utvrđivanju disciplinske odgovornosti učenika /učenice za koju se može izreći odgojno-disciplinska mjera premještaj u drugu najbližu osnovnu školu na području općine, odnosno Kantona, vodi Disciplinska komisija

Disciplinska komisija se sastoji od predsjednika i dva člana koje bira Školski odbor škole iz reda nastavnika/nastavnica za tekuću školsku godinu.

U Disciplinsku komisiju ne mogu biti birani članovi Školskog odbora i direktor škole.

Član 21.

Inicijativu za pokretanje disciplinskog postupka može dati svaki zaposlenik škole.

Disciplinska komisija donosi odluke većinom glasova svih članova komisije.

O radu Disciplinske komisije vodi se sveska zapisnika.

Član 22.

Učenik/učenica mora biti saslušan pred Disciplinskom komisijom, izuzev ako se bez opravdanih razloga ne odazove na uredno dostavljen poziv.

Disciplinska komisija nakon saslušanja učenika sagledava i procjenjuje razloge zbog kojih je došlo do povrede discipline i sastavlja izvještaj o provedenom postupku disciplinske odgovornosti učenika, koji dostavlja Nastavničkom vijeću škole.

Član 23.

Nastavničko vijeće nakon što je dobilo izvještaj o radu Disciplinske komisije o provedenom postupku disciplinske odgovornosti učenika/učenicu donosi odluku.

Nastavničko vijeće svojom odlukom može učenika/učenicu proglasiti odgovornim za učinjenu povredu discipline i izreći odgojno-disciplinsku mjeru ili osloboditi učenika/učenicu odgovornosti.

Član 24.

Ako je u školi pričinjena materijalna šteta od strane učenika, škola je dužna štetu naplatiti.

Član 25.

Postojanje štete i okolnosti pod kojima je nastala, njenu visinu i odgovornost učenika koji je štetu prouzrokovao, utvrđuje Komisija za procjenu štete.

Školski odbor za svaku školsku godinu imenuje Komisiju za procjenu materijalne štete učinjene od strane učenika.

Dužnost Komisije je da utvrdi stvarnu materijalnu štetu i da odredi iznos nadoknade.

Ne može se odrediti veća šteta od stvarne cijene, niti se može odrediti plaćanje nadoknade za štetu koja je nastala zbog redovne upotrebe.

Član 26.

Učenik/učenica koji namjerno ili iz krajnje nepažnje prouzrokuje materijalnu štetu školi dužan je istu nadoknaditi.

Ako štetu prouzrokuje više učenika/učenica, svaki učenik/učenica je odgovoran za dio štete koja je prouzrokovana.

Ukoliko se ne može utvrditi dio štete koji je prouzrokovao svaki učenik/učenica, smatra se da su svi učenici podjednako odgovorni i štetu nadoknađuju u jednakim dijelovima.

Član 27.

Pričinjenu materijalnu štetu u školi učenik/učenica, odnosno njegov roditelj ili staratelj dužan je nadoknaditi.

Član 28.

Na utvrđeni iznos nadoknade materijalne štete roditelj ili staratelj ima pravo prigovora Školskom odboru u roku od 7 dana od dana prijema obavještenja o naknadi štete.

Član 29.

Ukoliko roditelj ili staratelj u određenom roku ne nadoknadi štetu, škola će putem nadležnog Suda tražiti nadoknadu štete.

Član 30.

Izrečene odgojno – disciplinske mjere za sobom povlače sniženje ocjene iz vladanja i to:

- ukor razrednika/razrednice povlači sniženje ocjene iz vladanja na "vrlodobro",
- ukor odjeljenskog vijeća povlači sniženje ocjene iz vladanja na "dobro",
- ukor direktora povlači sniženje ocjene iz vladanja na "zadovoljava",
- ukor Nastavničkog vijeća povlači sniženje ocjene iz vladanja na "loše"
- premještaj u drugo odjeljenje znači zadržavanje ocjene iz vladanja "loše".

Učenik VIII razreda koji iz vladanja ima ocjenu "dobro" i niže ne može ići na ekskurziju.

Član 31.

Sve odgojno- disciplinske mjere se izriču neposredno po učinjenom prekršaju, a najkasnije 30 dana od dana učinjenog prekršaja.

Sve izrečene odgojno – disciplinske mjere moraju biti evidentirane u odjeljenskoj knjizi, đlačkoj knjižici, zapisnicima odjeljenskih vijeća, zapisnicima Nastavničkog vijeća i svesci zapisnika Školskog odbora.

Za ispravnu evidenciju izrečenih odgojno-disciplinskih mjera koje se upisuju u odjeljenskoj knjizi i đlačkoj knjižici odgovoran je razrednik/razrednica.

Član 32.

O izrečenim odgojno – disciplinskim mjerama direktor/direktorica škole najmanje jednom godišnje podnosi izvještaj Školskom odboru.

V POSTUPAK PO ŽALBI NA IZREČENU ODGOJNO – DISCIPLINSKU MJERU

Član 33.

Protiv odgojno-disciplinske mjere ukor Nastavničkog vijeća, premještaj u drugo odjeljenje iste škole, kao i odgojno-disciplinske mjere premještaj u drugu najbližu školu na području općine, odnosno Kantona, roditelj ili staratelj učenika može izjaviti žalbu.

Žalba se podnosi Školskom odboru u roku od 7 dana od dana dostavljanja rješenja o izrečenoj odgojno-disciplinskoj mjeri.

Ako roditelj ili staratelj podnese žalbu u skladu sa ovim članom, izvršenje disciplinske mjere odgađa se do odluke po žalbi.

U odlučivanju o žalbi Školski odbor, u roku od 8 dana, može:

- a) potvrditi odluku
- b) preinačiti odluku i eventualno primijeniti drugu disciplinsku mjeru.

Škola provodi odluku Školskog odbora donesenu u skladu sa prethodnim stavom. Odluka Školskog odbora je konačna.

Član 34.

Odgojno – disciplinska mjera važi za školsku godinu u kojoj je izrečena, a može se u toku školske godine ublažiti ili ukinuti ukoliko učenik/učenica svojim ponašanjem pokaže da je došlo do prestanka razloga za izricanje mjere.

Prijedlog za ukidanje ili ublažavanje odgojno-disciplinske mjere daje razrednik.

Ukidanje odgojno-disciplinske mjere vrši organ koji je izrekao mjeru.

VI ZAVRŠNE ODREDBE

Član 35.

Ovaj Pravilnik stupa na snagu danom usvajanja na sjednici Školskog odbora, a njegovim usvajanjem prestaje da važi Pravilnik o odgojno-disciplinskim mjerama za učenike br:01-291/2005 od 07.06.2005.godine.

Član 36.

Izmjene i dopune Pravilnika vrše se na način i po postupku po kome je i donesen.

Broj: 01-48/2010

Dana, 26.01.2010.godine



Bosna i Hercegovina
Federacija Bosne i Hercegovine
Kanton Sarajevo
Općina Vogošća
JU Osnovna škola "Mirsad Prnjavorac" Vogošća
Školski odbor
Broj: 01-48/2010
Dana, 26.01.2010.godine

Na osnovu člana 90. Zakona o osnovnom odgoju i obrazovanju ("Službene novine Kantona Sarajevo" broj:10/04, 21/06 i 26/08) i člana 87. Pravila JU Osnovne škole "Mirsad Prnjavorac" Vogošća, Školski odbor je na sjednici održanoj dana 26.01.2010.godine donio

ODLUKU

1. Usvaja se Pravilnik o odgojno disciplinskim mjerama za učenike.
2. Usvajanjem Pravilnika iz stava 1. ove odluke prestaje da važi Pravilnik o odgojno disciplinskim mjerama za učenike broj:01-291/2005 od 07.06.2005.godine.
3. Odluka stupa na snagu danom donošenja.

Dostavljeno:

1. Direktorici škole
2. Na oglasnu tablu
3. Arhivi



Predsjednik
Školskog odbora

Amir Mustafić
/ Amir Mustafić /